



P R A V I L N I K
O POSTUPKU PO INICIJATIVI ZA ODUZIMANJE AKADEMSKOG
ODNOSNO NAUČNOISTRAŽIVAČKOG ZVANJA NA
UNIVERZITETU U SARAJEVU

Sarajevo, juli 2026. godine



Na osnovu člana 61. stav (1) tačka d), a u vezi sa članom 119. stav (3) Zakona o visokom obrazovanju („Službene novine Kantona Sarajevo“, broj 36/22 i 28/25), člana 21. Zakona o naučnoistraživačkoj djelatnosti („Službene novine Kantona Sarajevo“, broj 26/16) i člana 64. tačka v), a u vezi sa članom 238. Statuta Univerziteta u Sarajevu, uz prethodno Mišljenje Odbora za normativna pitanja Univerziteta u Sarajevu, broj: broj: 0105-6804-4/26 od 13. 07. 2026. godine, Senat Univerziteta u Sarajevu na 21. redovnoj sjednici održanoj 15. 07. 2026. godine, *donosi*

PRAVILNIK O POSTUPKU PO INICIJATIVI ZA ODUZIMANJE AKADEMSKOG ODNOSNO NAUČNOISTRAŽIVAČKOG ZVANJA NA UNIVERZITETU U SARAJEVU

DIO I - OPĆE ODREDBE

Član 1.

(Predmet)

Pravilnikom o postupku po inicijativi za oduzimanje akademskog odnosno naučnoistraživačkog zvanja na Univerzitetu u Sarajevu (u daljem tekstu: Pravilnik) uređuje se postupak, nadležnost, procesne garancije, prava i obaveze učesnika, način odlučivanja i pravna zaštita u postupku oduzimanja akademskog odnosno naučnoistraživačkog zvanja stečenog na Univerzitetu u Sarajevu (dalje u tekstu: Univerzitet) u skladu sa Zakonom o visokom obrazovanju („Službene novine Kantona Sarajevo“, broj 36/22 i 28/25), Zakonom o naučnoistraživačkoj djelatnosti („Službene novine Kantona Sarajevo“, broj 26/16), Zakonom o upravnom postupku Federacije Bosne i Hercegovine, Statutom Univerziteta u Sarajevu (dalje u tekstu: Statut) i općim aktima Univerziteta.

Član 2.

(Rodno osjetljiv jezik)

Izrazi koji se koriste u ovom Pravilniku, a imaju rodno značenje, odnose se jednako na muški i ženski rod.

Član 3.

(Pravna priroda postupka)

- (1) Postupak po ovom Pravilniku predstavlja poseban postupak akademskog odlučivanja u kojem Senat Univerziteta u Sarajevu, na osnovu stručnog nalaza i prijedloga Komisije, odlučuje o postojanju ili nepostojanju razloga za oduzimanje akademskog odnosno naučnoistraživačkog zvanja iz člana 238. Statuta.
- (2) Na procesna pitanja koja nisu uređena ovim Pravilnikom shodno se primjenjuju načela i odgovarajuće odredbe Zakona o upravnom postupku Federacije Bosne i Hercegovine, ukoliko nisu nespojive sa Zakonom o visokom obrazovanju, Statutom Univerziteta u Sarajevu i prirodom akademskog odlučivanja.
- (3) Postupak se zasniva na načelima zakonitosti, materijalne istine, saslušanja stranke, jednakosti učesnika, nepristrasnosti, proporcionalnosti, zabrane prejudiciranja ishoda postupka i prava na obrazloženu odluku

DIO II - NAČELA, NADLEŽNOST I UČESNICI U POSTUPKU

Član 4.

(Načela)

Postupak oduzimanja akademskog odnosno naučnoistraživačkog zvanja zasniva se na sljedećim načelima:

- a) zakonitosti;
- b) zaštite prava stranke i javnog interesa;
- c) materijalne istine;
- d) saslušanja stranke;
- e) objektivnosti;
- f) nepristrasnosti i samostalnosti u odlučivanju;
- g) proporcionalnosti;
- h) zabrane zloupotrebe prava;
- i) zabrane prejudiciranja ishoda postupka;
- j) zaštite dostojanstva, profesionalnog i akademskog integriteta.

Član 5.

(Zaštita dostojanstva, profesionalnog i akademskog integriteta)

- (1) U postupku oduzimanja akademskog odnosno naučnoistraživačkog zvanja sva tijela i učesnici u postupku dužni su postupati na način kojim se štite dostojanstvo, profesionalni integritet i prava lica na koje se postupak odnosi, uz poštivanje akademskog integriteta, autonomije Univerziteta i javnog interesa u oblasti visokog obrazovanja.
- (2) Tokom vođenja postupka licu na koje se postupak odnosi osigurava se puno ostvarivanje procesnih prava utvrđenih ovim Pravilnikom, uključujući pravo da se izjasni o svim činjenicama, okolnostima i dokazima relevantnim za donošenje odluke.
- (3) Postupak se provodi na način kojim se osigurava zaštita akademskog integriteta i vjerodostojnosti akademskih i naučnoistraživačkih zvanja, uz izbjegavanje neopravdanog narušavanja dostojanstva, profesionalnog integriteta i položaja lica na koje se postupak odnosi prije donošenja konačne odluke.

Član 6.

(Komisija za provođenje postupka oduzimanja akademskog odnosno naučnoistraživačkog zvanja)

- (1) Komisija za provođenje postupka po inicijativi za oduzimanje akademskog odnosno naučnoistraživačkog zvanja (u daljem tekstu: Komisija) je *ad hoc* stručno-pomoćno tijelo Senata, koje se imenuje za svaki pojedinačni predmet radi stručnog ispitivanja činjenica, provođenja dokaznih radnji i sačinjavanja obrazloženog nalaza i prijedloga odluke Senatu.
- (2) Komisija ima pet (5) članova.
- (3) Četiri (4) člana Komisije imenuju se iz reda nastavnika izabranih u istu ili srodnu naučnu oblast iz koje je izvršen izbor u akademsko/naučnoistraživačko zvanje čije se oduzimanje predlaže, pri čemu moraju biti izabrani u isto ili više akademsko/naučnoistraživačko zvanje u odnosu na zvanje koje je predmet postupka, sa Univerziteta ili drugih akreditovanih visokoškolskih ustanova u Bosni i Hercegovini ili inostranstvu.
- (4) Jedan (1) član Komisije imenuje se iz reda istaknutih stručnjaka iz odgovarajuće ili srodne naučne oblasti, u pravilu iz reda redovnih članova Akademije nauka i umjetnosti Bosne i Hercegovine, odnosno iz reda istaknutih stručnjaka, pod uslovom da se radi o institucijama ili licima sa međunarodno priznatom naučnom referentnošću i akademskim integritetom.

- (5) Senat prilikom imenovanja Komisije imenovat će najmanje dva zamjenska članova Komisije, vodeći računa da svaki zamjenski član ispunjava uslove propisane za člana. Zamjenski član učestvuje u radu Komisije samo u slučaju spriječenosti ili izuzeća člana Komisije kojeg zamjenjuje.
- (6) Za člana Komisije ne može biti imenovano lice koje je učestvovalo kao član komisije u postupku izbora u akademsko/naučnoistraživačko zvanje koje je predmet postupka oduzimanja.
- (7) Članovi Komisije iz reda članova biraju predsjednika Komisije na prvoj sjednici. Ukoliko predsjednik Komisije ne bude izabran na prvoj sjednici, Komisijom predsjedava najstariji član Komisije.
- (8) Sekretara Komisije imenuje Senat odlukom o imenovanju Komisije. Za sekretara Komisije imenuje se sekretar članice na koju se predmet postupka izbora u akademsko odnosno naučnoistraživačko zvanje odnosi. Sekretar Komisije pruža stručnu i administrativnu podršku radu Komisije, vodi zapisnike i stara se o urednosti i potpunosti spisa predmeta.
- (9) Svaki član i sekretar Komisije dužan je, na konstitutivnoj sjednici ili najkasnije u roku od tri (3) dana od imenovanja, potpisati izjavu o nepristrasnosti i odsutnosti sukoba interesa u skladu sa članom 8. ovog Pravilnika. Ukoliko član ili sekretar utvrdi postojanje razloga za izuzeće, dužan je odmah obavijestiti Senat radi zamjene.
- (10) Komisija punovažno odlučuje uz aktivno učešće najmanje 3 od 5 članova.

Član 7.

(Stranka u postupku)

- (1) Lice u odnosu na koje se vodi postupak po inicijativi za oduzimanje akademskog odnosno naučnoistraživačkog zvanja ima status stranke u postupku.
- (2) Stranci u postupku osigurava se ostvarivanje prava utvrđenih ovim Pravilnikom, Statutom, Zakonom o visokom obrazovanju, te prava koja proizlaze iz primjene Zakona o upravnom postupku Federacije Bosne i Hercegovine.
- (3) Podnosilac inicijative nema status stranke u postupku i nema pravo procesnog učešća nakon donošenja odluke o pokretanju postupka, osim obaveze da na zahtjev Komisije dostavi dodatne podatke, dokumentaciju ili pojašnjenja kojima raspolaže.
- (4) Podnosilac inicijative ima pravo biti obaviješten o tome da li je inicijativa odbačena, odložena u spis ili je povodom nje pokrenut postupak, bez prava uvida u spis predmeta nakon pokretanja postupka.

Član 8.

(Izuzeće)

- (1) Član i sekretar Komisije ne mogu učestvovati u postupku ako postoje razlozi za izuzeće propisani Zakonom o upravnom postupku Federacije Bosne i Hercegovine, Statutom ili ovim Pravilnikom.
- (2) Pored razloga za izuzeće propisanih Zakonom o upravnom postupku Federacije Bosne i Hercegovine, razlozi za izuzeće u smislu ovog Pravilnika uključuju i sljedeće okolnosti u odnosu na lice na koje se postupak odnosi: a) mentorstvo na doktorskoj disertaciji, magistarskom ili završnom radu; b) koautorstvo na naučnim ili stručnim radovima; c) zajedničko učešće u naučnoistraživačkim ili stručnim projektima u periodu od pet (5) godina prije pokretanja postupka ili koji su uzimani u obzir prilikom izbora u zvanje; d) raniji učesnički odnos u postupku izbora u zvanje koje je predmet oduzimanja; e) sve druge okolnosti koje bi u razumnoj procjeni mogle izazvati sumnju u nepristrasnost.
- (3) Stranka ima pravo u roku od osam (8) dana od dana prijema obavijesti o sastavu Komisije podnijeti Senatu pisani zahtjev za izuzeće člana ili sekretara Komisije, uz navođenje razloga. Senat odlučuje o zahtjevu u roku od petnaest (15) dana od prijema zahtjeva.
- (4) O izuzeću člana ili sekretara Komisije po službenoj dužnosti ili na zahtjev stranke odlučuje Senat.

- (5) Član Senata koji je u konkretnom predmetu bio mentor, član komisije za izbor u zvanje, član komisije za ocjenu ili odbranu završnog, magistarskog ili doktorskog rada, koautor radova sa strankom, podnosilac inicijative, član vijeća članice koje je prethodno odlučivalo o istom pitanju ili kod kojeg postoje druge okolnosti koje mogu dovesti u sumnju njegovu nepristrasnost, ne učestvuje u raspravi niti u glasanju o tom predmetu.
- (6) Član Senata dužan je prije rasprave o konkretnom predmetu prijaviti postojanje okolnosti iz stava (5) ovog člana.
- (7) O izuzeću člana Senata iz stava (5) ovog člana odlučuje Senat zaključkom, bez učešća člana Senata na kojeg se zahtjev za izuzeće odnosi.

DIO III - POKRETANJE POSTUPKA, UTVRĐIVANJE ČINJENIČNOG STANJA I DOKAZI

Član 9.

(Način pokretanja postupka)

- (1) Postupak po inicijativi za oduzimanje akademskog odnosno naučnoistraživačkog zvanja pokreće Senat po službenoj dužnosti ili na osnovu inicijative fizičkog ili pravnog lica.
- (2) Inicijativa iz stava (1) ovog člana podnosi se u pisanom obliku i sadrži podatke o podnosiocu, kao i navode o okolnostima koje mogu upućivati na postojanje razloga iz člana 238. Statuta.

Član 10.

(Prethodno ispitivanje inicijative)

- (1) Prije donošenja odluke o pokretanju postupka Senat ispituje da li inicijativa:
 - a) sadrži identitet podnosioca;
 - b) sadrži dovoljno određene okolnosti koje mogu ukazivati na postojanje razloga iz člana 238. Statuta;
 - c) sadrži ili upućuje na raspoložive dokaze;
 - d) nije očigledno neosnovana ili podnesena radi zloupotrebe prava.
- (2) Ukoliko je inicijativa podnesena anonimno, takav podnesak nema status formalne inicijative, ali može predstavljati povod za prikupljanje službenih saznanja radi ocjene da li postoje razlozi za pokretanje postupka po službenoj dužnosti.
- (3) U fazi prethodnog ispitivanja inicijative Senat ne utvrđuje osnovanost navoda niti odlučuje o postojanju razloga za oduzimanje zvanja, već isključivo cijeni da li postoje potrebne okolnosti i procesni uslovi za pokretanje postupka.
- (4) Ukoliko Senat nađe da inicijativa ne ispunjava uslove iz stava (1) ovog člana, donosi zaključak o odbacivanju inicijative, koji dostavlja podnosiocu sa obrazloženjem.
- (5) Ukoliko Senat ocijeni da su ispunjeni uslovi za pokretanje postupka, donosi odluku o pokretanju postupka i imenovanju Komisije.

Član 11.

(Obavješćavanje stranke)

- (1) Stranka se pisanim putem obavještava o pokretanju postupka u roku od osam (8) dana od dana donošenja odluke Senata o pokretanju postupka.
- (2) Obavijest iz stava (1) ovog člana naročito sadrži:
 - a) pravni osnov za pokretanje postupka;

- b) opis navoda i okolnosti koje su osnov za pokretanje postupka;
 - c) pouku o pravu na uvid u spis i izdavanje kopija;
 - d) pouku o pravu na punomoćnika;
 - e) pouku o pravu na predlaganje i osporavanje dokaza;
 - f) pouku o pravu na izjašnjenje o svim činjenicama, dokazima i stručnim mišljenjima;
 - g) pouku o pravu na zahtjev za izuzeće članova i sekretara Komisije;
 - h) pouku o mogućnosti da stranka obrazloženo zatraži održavanje usmene rasprave.
- (3) Uz obavijest iz stava (1) ovog člana stranci se dostavlja odluka Senata o pokretanju postupka, kao i inicijativa za pokretanje postupka sa priloženom dokumentacijom.
- (4) Nakon imenovanja, stranka se pisanim putem obavještava o sastavu Komisije i pravu stranke na zahtjev za izuzeće u roku od osam (8) dana od prijema ove obavijesti.

Član 12.

(Uvid u spis)

- (1) Stranka ima pravo uvida u cjelokupan spis predmeta u svakoj fazi postupka, osim u dijelu u kojem je pristup ograničen zakonom radi zaštite ličnih podataka trećih lica, poslovne tajne ili druge zakonom zaštićene vrijednosti.
- (2) O ograničenju uvida u pojedini dio spisa odlučuje predsjednik Komisije posebnim zabilježenim aktom, uz obavezu da se stranci, kad god je to moguće, omogući uvid u verziju dokumenta u kojem su uklonjeni lični identifikatori (anonimizirana verzija dokumenata).
- (3) O izvršenom uvidu u spis sačinjava se službena zabilješka koja sadrži datum uvida, ime lica koje je izvršilo uvid, oznaku dokumenata koji su dati na uvid i podatak o kopijama koje su izdate.
- (4) Stranci se na njen zahtjev izdaju kopije svih dokaza na kojima se može zasnivati odluka, uključujući elektronske kopije, osim ako je drugačije propisano zakonom.
- (5) Nijedan dokaz ne može biti osnov za donošenje odluke ako prethodno nije bio dostupan stranci radi izjašnjenja.

Član 13.

(Usmena rasprava)

- (1) Komisija može održati usmenu raspravu kada ocijeni da je to potrebno radi pravilnog i potpunog utvrđivanja činjeničnog stanja, o čemu Komisija donosi posebnu odluku.
- (2) Komisija je dužna održati usmenu raspravu ako su činjenice bitno sporne, ako postoji potreba neposrednog razjašnjenja suprotstavljenih dokaza ili stručnih mišljenja, ili ako stranka obrazloženo zatraži održavanje usmene rasprave, a Komisija ocijeni da bi izostanak rasprave mogao uticati na pravilno utvrđivanje činjenica.
- (3) Na usmenu raspravu poziva se stranka, njen punomoćnik, po potrebi podnosilac inicijative, predstavnik članice, stručna lica, vještaci ili druga lica čije prisustvo Komisija ocijeni potrebnim.
- (4) O usmenoj raspravi vodi se zapisnik koji potpisuju predsjednik Komisije, sekretar Komisije i prisutna lica koja su dala izjavu.
- (5) Uz obrazložen zahtjev, stranka u postupku može zatražiti usmenu raspravu.
- (6) Ako Komisija odbije obrazložen zahtjev stranke za održavanje usmene rasprave, dužna je razloge odbijanja posebno obrazložiti u konačnom prijedlogu odluke.

Član 14.

(Materijalna istina i teret dokazivanja)

- (1) Komisija je dužna potpuno, objektivno i nepristrasno utvrditi sve činjenice i okolnosti koje su od značaja za sačinjavanje nalaza i prijedloga odluke.

- (2) Teret dokazivanja postojanja razloga za oduzimanje akademskog odnosno naučnoistraživačkog zvanja snosi Senat, putem Komisije kao svog stručno-pomoćnog tijela.
- (3) Stranka nije dužna dokazivati negativne činjenice.
- (4) Komisija je dužna po službenoj dužnosti pribaviti i cijeniti dokaze koji idu u korist i dokaze koji idu na štetu stranke.

Član 15.

(Dokazi i pravo na izjašnjenje)

- (1) Podnosilac inicijative dužan je uz inicijativu dostaviti podatke, dokumentaciju i druge dokaze kojima raspolaže, a koji mogu biti od značaja za vođenje postupka.
- (2) Komisija može pribavljati i druge dokaze i podatke koje ocijeni potrebnim za potpuno i pravilno utvrđivanje činjeničnog stanja.
- (3) Komisija može po službenoj dužnosti pribaviti sve raspoložive dokaze koji mogu biti od značaja za pravilno utvrđivanje činjenica, bez obzira da li idu u korist ili na štetu stranke.
- (4) Nijedna činjenica, okolnost, dokaz ili stručno mišljenje ne mogu biti osnov za donošenje odluke ukoliko stranci prethodno nije omogućeno da se o njima izjasni.

Član 16.

(Ocjena dokaza i standard dokazivanja)

- (1) Komisija odlučuje koje će činjenice uzeti kao utvrđene na osnovu savjesne i brižljive ocjene svakog dokaza posebno i svih dokaza zajedno, kao i na osnovu rezultata cjelokupnog postupka.
- (2) Odbijanje izvođenja predloženog dokaza mora biti posebno obrazloženo.
- (3) Nedostupnost relevantne službene dokumentacije kojom se dokazuje osporavano akademsko odnosno naučnoistraživačko zvanje ne može sama po sebi predstavljati dovoljan osnov za utvrđivanje postojanja razloga iz člana 238. Statuta.
- (4) Razlozi za oduzimanje akademskog odnosno naučnoistraživačkog zvanja smatraju se utvrđenim samo ako su jasno i potpuno utvrđeni na osnovu vjerodostojnih i međusobno saglasnih dokaza koji omogućavaju pouzdan i uvjerljiv zaključak o postojanju razloga iz člana 238. Statuta.
- (5) Ako nakon provedenog postupka ostane neotklonjena sumnja u pogledu činjenica koje su odlučne za donošenje odluke, takva sumnja ne može biti osnov za oduzimanje akademskog odnosno naučnoistraživačkog zvanja.

Član 17.

(Pravo na izjašnjenje)

- (1) Prije upućivanja prijedloga odluke Senatu, stranci se mora omogućiti da se izjasni o svim činjenicama, okolnostima, dokazima i stručnim mišljenjima relevantnim za donošenje odluke.
- (2) Po potrebi, Komisija može zatražiti izjašnjenje vijeća članice i komisije koja je sačinila izvještaj za izbor u akademsko odnosno naučnoistraživačko zvanje, ukoliko ocijeni da je to od značaja za utvrđivanje činjenica i okolnosti relevantnih za postupak.
- (3) Stranka, vijeće članice i komisija iz stava (2) ovog člana mogu dostaviti pisano izjašnjenje u roku od 30 dana od dana prijema zahtjeva i odgovarajuće dokumentacije.

Član 18.

(Završno izjašnjenje stranke)

- (1) Nakon što Komisija utvrdi činjenično stanje, a prije upućivanja prijedloga Senatu, Komisija dostavlja stranci nacrt nalaza i prijedloga odluke.

- (2) Stranka ima pravo da u roku od petnaest (15) dana od prijema nacрта dostavi završno izjašnjenje u pisanom obliku. Ovaj rok je prekluzivan; na prijedlog stranke Komisija ga može produžiti jednom i najviše za petnaest (15) dana iz opravdanih razloga.
- (3) Komisija je dužna razmotriti navode iz završnog izjašnjenja i posebno se o njima očitovati u prijedlogu odluke. Ako navodi iz završnog izjašnjenja utječu na ocjenu činjeničnog stanja, Komisija može dopuniti dokazni postupak.

DIO IV - DONOŠENJE ODLUKE I PRAVNI LIJEK

Član 19.

(Prijedlog Komisije i donošenje odluke)

- (1) Komisija, nakon provedenog postupka, utvrđuje činjenice i okolnosti relevantne za odlučivanje i sačinjava obrazloženi prijedlog odluke o oduzimanju ili neoduzimanju akademskog odnosno naučnoistraživačkog zvanja.
- (2) Komisija donosi prijedlog odluke većinom glasova od ukupnog broja članova. Član Komisije koji se ne slaže sa prijedlogom ima pravo izdvojenog mišljenja, koje se prilaže uz prijedlog odluke.
- (3) Prijedlog iz stava (1) ovog člana dostavlja se Senatu na odlučivanje.
- (4) Odluku o oduzimanju ili neoduzimanju akademskog odnosno naučnoistraživačkog zvanja donosi Senat.
- (5) Komisija je dužna dostaviti Senatu obrazloženi prijedlog odluke u roku od devedeset (90) dana od dana imenovanja, osim ako Komisija prije isteka roka zatraži njegovo produženje, a Senat odobri produženje zbog složenosti predmeta ili drugih opravdanih razloga.
- (6) Senat odlučuje o prijedlogu Komisije najkasnije u roku od četrdeset i pet (45) dana od dana dostavljanja prijedloga.
- (7) Senat odlučuje o prijedlogu Komisije nakon rasprave, pri čemu nije vezan prijedlogom Komisije, ali je dužan u obrazloženju odluke posebno navesti razloge zbog kojih prihvata ili ne prihvata nalaz i prijedlog Komisije.
- (8) Član Senata kod kojeg postoje razlozi za izuzeće iz člana 8. ovog Pravilnika ne učestvuje u raspravi niti u glasanju o konkretnom predmetu.

Član 20.

(Odluka/rješenje Senata)

- (1) Odluka Senata o oduzimanju ili neoduzimanju akademskog odnosno naučnoistraživačkog zvanja donosi se u formi rješenja.
- (2) Odluka/rješenje iz stava (1) ovog člana sadrži uvod, izreku, obrazloženje i pouku o pravnoj zaštiti, u skladu sa ovim Pravilnikom i članom 207. Zakona o upravnom postupku Federacije Bosne i Hercegovine.
- (3) Odluka/rješenje se dostavlja stranci bez odlaganja, u skladu sa pravilima o dostavljanju.

Član 21.

(Obrazloženje rješenja)

Obrazloženje rješenja naročito sadrži:

- a) utvrđene činjenice i okolnosti relevantne za donošenje odluke;
- b) listu i ocjenu izvedenih dokaza;
- c) sadržaj i ocjenu navoda stranke, uključujući navode iz završnog izjašnjenja;
- d) razloge zbog kojih su pojedini predloženi dokazi prihvaćeni ili odbijeni;
- e) razloge prihvatanja ili neprihvatanja nalaza i prijedloga Komisije;

- f) pravni osnov odluke;
- g) razloge zbog kojih je utvrđeno postojanje ili nepostojanje razloga iz člana 238. Statuta;
- h) razloge proporcionalnosti mjere, ako se donosi rješenje o oduzimanju zvanja.

Član 22.

(Pravno dejstvo i evidencije)

- (1) Rješenje o oduzimanju akademskog odnosno naučnoistraživačkog zvanja proizvodi pravno dejstvo od dana konačnosti, osim ako zakonom, sudskom odlukom ili rješenjem Senata nije drugačije određeno.
- (2) Rješenje iz stava (1) ovog člana nema retroaktivno dejstvo i ne utječe na pravne odnose, prava i obaveze nastale prije dana njenog pravnog dejstva, osim ako je zakonom ili drugim propisom drugačije određeno.
- (3) Univerzitet će po konačnosti odluke izvršiti odgovarajuće izmjene u službenim evidencijama, registrima i drugim javnim ispravama u skladu sa zakonom, u roku od trideset (30) dana od dana konačnosti odluke.
- (4) Ako stranka u zakonskom roku pokrene postupak sudske zaštite i zatraži odlaganje izvršenja, Univerzitet može odgoditi javno-publikacione i evidencijske posljedice rješenja do odluke nadležnog suda o zahtjevu za odlaganje, ako to nije protivno zakonu.

Član 23.

(Pravni lijek i sudska zaštita)

- (1) Rješenje Senata je konačno.
- (2) Protiv rješenja iz stava (1) ovog člana nije dopuštena žalba.
- (3) Protiv rješenja Senata pravna zaštita ostvaruje se pred nadležnim sudom u Sarajevu, u roku i postupku propisanim zakonom i Statutom Univerziteta u Sarajevu.

DIO V - ZAVRŠNE ODREDBE

Član 24.

(Zabrana zloupotrebe postupka)

- (1) Postupak po inicijativi za oduzimanje akademskog odnosno naučnoistraživačkog zvanja ne može se koristiti radi ostvarivanja ciljeva koji nisu u vezi sa zaštitom akademskog integriteta i primjenom člana 238. Statuta Univerziteta u Sarajevu, niti kao sredstvo disciplinskog, institucionalnog ili drugog nedopuštenog pritiska.
- (2) Zabranjena je svaka zloupotreba ovog postupka radi ostvarivanja političkih, ličnih, konkurentskih ili drugih ciljeva koji nisu neposredno povezani sa zaštitom zakonitosti i akademskog integriteta.

Član 25.

(Čuvanje spisa i zaštita podataka)

- (1) Spis predmeta u postupku oduzimanja akademskog odnosno naučnoistraživačkog zvanja čuva se trajno u arhivu Senata Univerziteta.
- (2) Pristup spisu predmeta ograničen je na stranku u postupku, članove i sekretara Komisije, ovlaštene službenike Senata i nadležne sudove, u skladu sa Zakonom o zaštiti ličnih podataka Bosne i Hercegovine.
- (3) Obrada ličnih podataka u postupku provodi se u skladu s načelima zakonitosti, ograničenja svrhe i minimizacije podataka.

Član 26.

(Obaveza učešća u radu Komisije)

- (1) U skladu sa odlukom Senata, imenovana lica/zaposlenici Univerziteta su obavezni učestvovati u radu Komisije.
- (2) Zaposlenici Univerziteta, nastavno i nenastavno osoblje, obavezni su pružiti svu potrebnu stručnu i administrativnu podršku radu Komisije.

Član 27.

(Stupanje na snagu)

Ovaj Pravilnik stupa na snagu danom donošenja i objavljuje se na zvaničnoj internet stranici Univerziteta te u evidenciji općih akata Senata Univerziteta u Sarajevu.

Član 28.

(Tumačenje odredbi)

Za tumačenje odredbi ovog Pravilnika nadležan je Senat Univerziteta u Sarajevu.

Član 29.

(Izmjene i dopune pravilnika)

Izmjene i dopune ovog Pravilnika vrše se po postupku za njegovo donošenje.

REKTOR

Prof. dr. Tarik Zaimović



Broj: 01-15-56-1/26

Sarajevo, 15. 07. 2026. godine